

MAWHPHURHNA HLEN: CHHIAHHLAWH HNA

(II Tim. 4:5; Jer 17:7-8)

C. Lalrohlu, BD IV



Thuhma:

Tunlaih mi tam tak hruaitu leh rawngbawltu inphahhnuai leh thuhnuairawlh taka rawngbawl thinte an chaklohna emaw ti a hmusit rawngkai leh tham loh phah nan te a hmang kan awm fo thin. Hetiang tih ching hian hruaitu nihna leh dinhmun a hrechiang lo tihna a ni. Nakina kohhran hruaitu ni tura tuna inbuatsaih mek te hian lehkhabu atang chauha hriatna zawng lovin thuhnuairawlh tak leh inngaitlawmtaka rawngbawlna tan thei tur a kan inbuatsaih a, hruaitu dinhmun tak hrechiang tur a kan inbuatsaih a tul hle in a lang.

Hruaitu nihna leh rawngbawlnate hi Pathian in kan kova a dah a ni a, mahni duhthu a neih leh chelh ngawt theih a ni lo a, hmuhsit leh ngaihnepe theih a ni lo. Hruaitu nih hi thil awlai tak a ni lo a, mawhphurhna tam tak a keng tel a chhiahhlawh hna a nih tlat avangin mi tam tak hruaitu hming pu si, mawhphurhna hlen chhuak zo lo leh hruaitu dinhmun luah zo lo hotu dinhmun chauh luah peih kan awm chho mek a ni.

I. Mawhphurhna hlen chu eng nge ni:

Mawhphurhna hlen chu, *‘Kan chung a chanvo leh tih tura tla, tha tak leh midangte tana chhenfakawm leh inngahna tlak, rintlak leh belhtlak a rahchhuah thei tura tha tak leh theihtawp a kan tih a kan thawh hi a ni,’* tiin tawi thei ang ber in kan hrilhfiah thei awm e.

Mawhphurhna hlen tih hian chanvo leh hruaitu nihna leh hruaina hna hlen mai ah a tawp lo a, hei hian tih tak takna, tlawmna nun, a hun a huaisenna a keng tel a. Phur thut emaw, chak vang emaw a tih theih leh neih theih a ni ngawt lo. Inngaitlawmna, inphahhnamna leh chhiahhlawh hna rilru pu chung a thawh a nih loh chuan midangte tana malsawmna thlentu ni lovin midangte harsatna siamtu, midangte daltu a ni hlauh zawk thei. Chuvangin hruaitu hna leh rawngbawlnain a ken tel mawhphurhna hlen tih hi thil namai lo tak, a hming ropui tak phena inzep thumawi leh nalh tak tel lo chuan famkim thei hauh si lo a ni. Chu thumawi leh nalh tak neitu erawh chu tu pawh ni se ngaihsan a hlauh a, chumi hlutna leh ngaihsanna chang hre lo chuan nun awmzia hrechiang a hrefiah turin kawng thui tak a kal a la ngaihzia a hre tel lo fo bawh thin. Thiltihin a sawifiah zo lo a, chetzia a lan tir a ngai fo thin.

1.1. Thuthlunglui lamah

Thuthlunglhuiah hian Pathianin mawhphurhna a pek leh hruaitu hna a pekte chanchin tam tak hmuh tur a awm a. Hruaitu tih hian chhiahhlawh hna a ken tel avangin hruaitu ropui tak tak zingah hian *Lalpa Chhiahhlawh* ti a koh sawi tur an awm nual mai. A hnam zawngah chuan Israel te kha Pathian hnam thlan/Pathian chhiahhlawh te kan ti thei ang.(Lev 25:42,55). Abrahamah pawh Pathian in a ko chhuak a “*Ka chhiahhlawh Abraham*” a ti kher a ni.(Gen 26:24). He a chhiahhlawh nihna dinhmun hi mawhphurhna hlen chhuak turin leh midangte tana malsawmna ni turin a ni daih a ni (Gen 12:3). Mosia pawh kha ka chhiahhlawh tiin Pathian khan a ko a, a ni pawh kha midangte tana malsawmna thlentun tura Pathianin a buatsaih a ni (Josua 1:7; II Lalte 21:8). Davida pawh kha Phillistia laka a mite chhanhim tura Pathianin a ruat “*Ka chhiahhlawh Davida*” a tih kher thin a ni bawk.(2 Sam 3:8).

1.2. Thuthlungthar lamah:

Thuthlungtharah hian Lal Isua nun atangin chhiahhlawh hna leh mawhphurhna ropui tak dinhmun kan hmu thei ang. Midangte tan rawngbawlin damlo a ti dam a, mitthi a kaitho a midang tan a hun pum a hmang a ni. Hei bakah Isua zirtirte rawngbawlna kha chhiahhlawh rawngbawlna a ni a, midangte tanpui hi chanvo danglam bik leh ropui tak a ni bawk. An rawngbawlna khan thliar bik a neilo a, hmeichhia pawhin thanhnemngai takin midang tan an hun an hlan a ni (Mt 27:55; Mk 1:31, Lk 8:3). *Kenkriai* khuaa kohhranho rawngbawltu Phoebi chanchin atang paw'n kan hre thei a ni (Rom 16:1). Tin, tirhko Paula leh a rawngbawlpuite rawngbawlna kha chhiahhlawh hna ropui tak leh midangte tana malsawmna a ni bawk (II Kor 6:4;11:23; Eph 3:7).

2. Mawhphurhna hlen turin eng nge pawimawh?

Rinawmna -Mawhphurhna hlen tur hian mipat hmeichhiatna, ruihtheihthil, sum leh paiah te kan rinawm tur a ni. Thlemna chi hrang hrang karah pawh Pathian tana rinawm leh danglam ngam kan nih a pawimawh hle (Rom 12:1-2). Thil pakhat a kan rinawm loh hian kawng tam takah harsatna min siamsak thin a, mawhphurhna hlen turin huaisen a har fo thin.

Mi tam tak chu chawimawi leh lansarh duhin rawng an bawl a, lemchangin hahtlak takin hun an hmang thin. Chhiahhlawh hna tak tak thawktu chuan hetiang hi a ngaihtuah hman lo a, chawl thei a ni lo tih hriain harsatna hnuaiyah pawh ding ngamin chhel tak leh rinawm takin a bei tang tang thin. Chuvangin mawhphurhna hlen chhuak turin rinawm i la, he lei mai bakah chatuan ram thlengin chan tha kan chang thei dawn a ni (Thup2:10).

Inpekna - Mawhphurhna hlen tur hian inpekna a pawimawh hle. A chungah kan sawi tak zawng zawngte khian an chungah chanvo tla leh mawhphurhna tla hlen chhuak turin an theihna, an thiamna an hmang a, hrehawm tam tak an tuar a ni. He inpekna hian thuawihna ringawt a kaw lo a, chu aia pawimawh chhiahhlawh hna ropui tak inphum chu miin a hmuh chuan

hrehawm mahse hlawhtlinna a awm dawn tih a hria a, a rilru leh taksa a theihna zawng zawng a hlanin a hmang thin.

3. Mawhphurhna hlen hi malsawm dawna a ni:

Mawhphurhna hlentute chuan malsawmna an dawng a, anmahni mai bakah midang tan malsawmna an ni thin. Hruaitu ropui Mosia te, Abrahamana, Pathianin mawhphurhna rit tak mai a kovah a dah hlen chhuaktu leh a thlahte thlenga malsawmna dawngtute chanchin kan hria. (Gen 22:17-18). Tin, Nova Pathianin mawhphurhna pawimawh tak mai a pek hlenchhuaktute, Joba fiahna khirh tak hlenchhuak a, a let tam taka malsawmna dawngtu chanchin te kan hria a ni (Joba 42:12ff). Heng mi ropui tak takte hian mawhphurhna hlen chhuak tur hian tuar an huam a, Pathian rinchhan chungana kal avangin an mawhphurhna an kova tla an hlenchhuak a, Pathian malsawmna an dawng a, Pathian avangin engkim a tih theih a ni tih hi a chiang hle a ni (Sam 37:5).

4. Mawhphurhna hlen hi chhiahhlawh hna a ni:

Thuthlunglui leh Thuthlungthara rawngbawlina leh hruaitu hna kan sawi atang khan mawhphurhna hlen hi chhiahhlawh hna a ni tih chiang takin kan hre thei ang. Thuthlunglui rawngbawlina *Thiltih rawngbawlina* kha Thuthlungtharah Lal Isua khan paih chuang lovin a rawn chhonzawm a. Lal Isua thu zirtirnaate kha thu (theory) ah tawp mai lovin thiltih (service) in a zui zel a ni.

Lal Isua zirtirnaah hian **Thiltih** (service) hi a laipui a ni an ti thin. Lal Isua ngeiin rawngbawlsaka awm tura lokal ni lova mite rawngbawl sak tur leh mi tam tak tlan nana a nun pe tura lokal a nihzia uar takin a sawi a ni (Matt 20:28; Lk 24:19). Lal Isua kha midangte tan hun pum hmangin mihringte chhandam hna thawk ni hial mah se chawimawi a hlawh khat hle a, a khua Nazareth-ah meuh pawh a hnawng hial a ni. Chumi in a entir chu mawhphurhna tak tak hlenchhuaktu leh chhiahhlawh hna thawk tak taktu chuan chawimawi a phut lo a, rawngbawlina leh hruaitu nihna a hrechiang a, phut awm lovin tlawm takin midangte tan a hun leh a nun a hmang mai thin. Tirhkoh Paula pawhin hei hi ngaipawimawhin thil tha ti atan ringtute hi siam kan ni tiin a sawi a (Eph 2:10). Rawngbawlina a ngaipawimawhin mawhphurhna ropui tak a hlen chhuak lovang tih hlauvin amah leh amah a infuih a, midangte tan eng chhitu nih a tum tlat thin.

Pathianin a rawngbawl tur leh midangte tana malsawmna thlentu ni tura a kohte khan mawhphurhna hlen turin chhiahhlawh hna ropui tak an thawk a ni. Midangte tana malsawmna ni turin chhiahhlawh hna an thawk a, tawrh a tul hunah an tuar a huaisen a hunah an huaisen bawka a Pathian rawn chungin an mawhphurhna chu an hlen chhuak a ni.

Tipna:

Mawhphurhna hlen tur hian tihur tam tak a awm a, huaisen a tul changte, tawrh a ngaih chang te, chhel a ngaih changte a awm fo thin. Heng zawng zawng huama ke kan pen chuan kan chungah eng mawhphurhna pawh awm se tha takin kan hlen chhuak thei ang a, keimahni mai bakah midang tan malsawmna kan ni thei ngei ang. Chumi hlen chhuak thei tur chuan chhiahhlawh silhfen inbelin tlawmna puan sin ngam ila mawhphurhna hlen chhuak turin chhiahhlawh rilru pu chungin thlen chin atangin hma i sawn zel ang u.